



# basic education

Department:  
Basic Education  
**REPUBLIC OF SOUTH AFRICA**

## **NATIONAL SENIOR CERTIFICATE**

**MOPHATO 12**

**SETSWANA PUOTLALELETSO YA NTLHA (FAL)**

**PAMPIRI YA BOBEDI (P2)**

**TLHAKOLE/MOPITLWE 2014**

**MADUO: 70**

**NAKO: 2 diura**

**Pampiri e, e na le ditsebe di le 20.**

**DITAELO**

1. Buisa tsebe e, ka kelotlhoko pele o ka simolola go araba dipotso.
2. O se ka wa leka go buisa pampiri yotlhe. Lebelela lenaane la diteng mo tsebeng e e latelang, mme o tshwae dipotso go tswa mo dikwalong tse o di buisitseng monongwaga. Morago ga moo tlhopha dipotso tse o batlang go di araba.
3. Pampiri e, e na le DIKAROLO di le NNE:  

KAROLO YA A:	Padi	(35)
KAROLO YA B:	Terama	(35)
KAROLO YA C:	Dikgangkhutshwe	(35)
KAROLO YA D:	Poko	(35)
4. Araba DIPOTSO di le PEDI fela go tswa mo dikarolong TSE PEDI tse di farologaneng:  

KAROLO YA A: PADI  
Araba potso e le NNGWE go tswa mo pading e o e buisitseng.

KAROLO YA B: TERAMA  
Araba potso e le NNGWE.

KAROLO YA C: DIKGANGKHUTSHWE  
Araba potso e le NNGWE.

KAROLO YA D: POKO  
Araba dipotso di le PEDI.  
Lenaneonetefatso le tla go thusa mo tlhophong ya dipotso.
5. Buisa ditaelo ka kelotlhoko mo tshimologong ya karolo NNGWE le NNGWE.
6. Kwala palo ya dikarabo jaaka dipotso di boditswe.
7. Simolola karolo NNGWE le NNGWE mo tsebeng e NTŠHWA.
8. Kwala ka mokwalo o o phepa o o bonalang.
9. Tiriso ya nako e e tshitshinngwang: Metsotso e le masomeamarataro (60) e dirisiwe mo karolong NNGWE le NNGWE.

**LENANEO LA DITENG**

Tsebe e, e tla letla batlhatlhojwa go tlhopha dipotso tse ba batlang go di araba kwa ntle ga go buisa pampiri yotlhe.

<b>KAROLO YA A: PADI</b>			
<b>Araba potso e le NNGWE fela.</b>			
<b>POTSO</b>	<b>MOFUTA WA POTSO</b>	<b>MADUO</b>	<b>TSEBE</b>
1. <i>Bogosi Kupe</i>	Potso ya tlhamo	35	5
	<b>KGOTSA</b>		
2. <i>Bogosi Kupe</i>	Dipotso tse dikhutshwane	35	5
	<b>KGOTSA</b>		
3. <i>Morabaraba</i>	Potso ya tlhamo	35	6
	<b>KGOTSA</b>		
4. <i>Morabaraba</i>	Dipotso tse dikhutshwane	35	7
<b>KAROLO YA B: TERAMA</b>			
<b>Araba potso e le NNGWE fela.</b>			
5. <i>Moipolai yo o sa lelelweng</i>	Potso ya tlhamo	35	9
	<b>KGOTSA</b>		
6. <i>Ba tla nkitse</i>	Dipotso tse dikhutshwane	35	9
	<b>KGOTSA</b>		
7. <i>Mosese, Mosese, Mangole le Menwana</i>	Potso ya tlhamo	35	11
	<b>KGOTSA</b>		
8. <i>Bo tla sa jang?</i>	Dipotso tse dikhutshwane	35	11
<b>KAROLO YA C: DIKGANGKHUTSHWE</b>			
<b>Araba potso e le NNGWE fela.</b>			
9. <i>Ke tla thuswa ke mang?</i>	Potso ya tlhamo	35	14
	<b>KGOTSA</b>		
10. <i>Lenyalo ke kgetse ya lesogodi</i>	Dipotso tse dikhutshwane	35	14
<b>KAROLO YA D: POKO</b>			
<b>Araba dipotso di le PEDI fela.</b>			
11. <i>Bosiela</i>	Dipotso tse dikhutshwane	17½	17
	<b>KGOTSA</b>		
12. <i>Mahuma-pelo a ga Phokojwe</i>	Dipotso tse dikhutshwane	17½	18
	<b>KGOTSA</b>		
13. <i>Botlhanka</i>	Dipotso tse dikhutshwane	17½	19
	<b>KGOTSA</b>		
14. <i>Bojaki</i>	Dipotso tse dikhutshwane	17½	20

**LENANEONETEFATSO**

Lebelela lenaneonetefatso le le latelang go bona gore o arabile dipotso tse di tlhokegang:

<b>KAROLO</b>	<b>NOMORO YA POTSO</b>	<b>PALO YA DIPOTSO TSE DI ARABIWANG</b>	<b>TSHWAYA POTSO E O E ARABILENG</b>
<b>A: PADI</b> (Tlhamo KGOTSA Dipotso tse dikhutshwane)	1–4	1	
<b>KGOTSA</b>			
<b>B: TERAMA</b> (Tlhamo KGOTSA Dipotso tse dikhutshwane)	5–8	1	
<b>KGOTSA</b>			
<b>C: DIKGANGKHUTSHWE</b> (Tlhamo KGOTSA Dipotso tse dikhutshwane)	9–10	1	
<b>KGOTSA</b>			
<b>D: POKO</b> (Dipotso tse dikhutshwane)	11–14	2	

**ELA TLHOKO:** Netefatsa gore o arabile dipotso go tswa mo dikarolong tse PEDI.

**KAROLO YA A: PADI**

Araba potso e le NNGWE fela mo karolong e.

**POTSO 1 (POTSO YA TLHAMO)****BOGOSI KUPE – DPS Monyaise**

Kwala tlhamo ya mafoko a a kana ka 250–300 ka ditiragalo tsa maiteko a go menola bogosi jwa Phiritona le seabe se se botlhokwa se Modimoeng a se tsereng go sireletsa kgosi.

**[35]****KGOTSA****POTSO 2 (DIPOTSO TSE DIKHUTSHWANE)****BOGOSI KUPE – DPS Monyaise**

Buisa nopolo e e latelang, mme morago o arabe dipotso.

A bolela bopelokgale jwa ga Modimoeng ka mmaka mogale: Jaaka a tsenye mo logageng a le esi a goga Sajene Botipe yo o rileng mo mosong a be a mo sotla; morago a goga rre Serokolo ba mo tlhobogile. Mmaagwe a itumela go utlwa a bua jalo. A itse gore o tshwanetse go begela mmaagwe, e se re ka moso a utlwa mo motseng a gakgamala gore ke eng a ntse a sa mmegele. 'Mma, o ntse o itse ke nna le ditsala kwa sekgweng sa ga Dimo, mme o sa itse lebaka. Go botoka gore o utlwe ka nna, e seng ka motho osele.' A mo lotlegela jaaka e rile a tswa go reka dikgomo kwa Sefatlhane a bona dingwe fa thoko ga tsela, nteko ke dikgomo tsa mmuso, ka go sa itse a di gapela mo dithabeng tsa Phiritona, mme nako yotlhe fa a ntse a seo mo gae o a bo a le kwa dikgomong tseo. Ga se gore o di utswile nnyaya.

Mmaagwe a mo tlhoma matlho. 'E le gore o ne o tsenwe ke eng?' A tila potso ya gagwe, a bolela jaaka e rile morago ga dikgomo tsa mmuso a gakologelwa dipogiso tsa boMokotedi, a ba tswa letsholo – a tsamaya le Modimoeng le Motlhoiwa. 'O raya Motlhoiwa o ke mo itseng?' Mmaagwe o ne a sa bolo go belaela gore o itse sengwe ka go nyelela ga bana ba ga kgaitsadie ka o ne a ise a ka a itshwenye go ba batla.

A mo tlhoma matlho lobaka lo loleele, a bona sefatlhego sa ga mogatsa Tukisang motsing go o neng a tlele go bega gore bana ba gagwe ba nyeletse, a lebetse jaaka a mo jeseditse kgobedung morago ga loso lwa ga Oshupile. Molato wa gagwe o ne o sekilwe ke ditshoswane. 'Jaanong ba kae?' 'Re ne re le dipoo tse pedi mo sakeng, mma. Di a bolaana ...'

- 2.1 Tukisang o amana jang le mmaagwe Obakeng? (1)
- 2.2 Naya leina la tsala ya ga Obakeng. (1)
- 2.3 Bana ba ga Tukisang ba goletse kwa kae? (1)
- 2.4 Ka dintlha di le PEDi, tlhalosa gore Obakeng o ne a lwela eng le bana ba ga Tukisang? (4)
- 2.5 A fa o lebile o ka re Obakeng ga a utswa dikgomo tsa mmuso? Tshegetska ka lebaka. (2)

- 2.6 Modisa wa dikgomo tsa mmuso o ne a le kwa kae fa dikgomo di timela? (1)
- 2.7 Maphodisa a dirile eng go leka go bona dikgomo tse di timetseng? (2)
- 2.8 Puso e itsitse jang gore dikgomo di timetse? (2)
- 2.9 Go tlile jang gore dikgomo tsa mmuso di timele? (2)
- 2.10 Motlhoiwa o ne a thusa Kgosi jang fa e ne e menolwa mo bogosing? (2)
- 2.11 Ka dintlha di le PEDI, tlhalosa semelo sa ga Modimoeng. (4)
- 2.12 Go ya ka Oshupile, mosadi o nyalelwa eng? Naya dintlha di le THARO fela. (3)
- 2.13 Loso lwa ga Oshupile lo senoletse mmaagwe Obakeng botho jwa ga Tukisang. Tshegetsatsa ntlha e, ka lebaka. (2)
- 2.14 Neela tshobotsi ya ga Tukisang ka dintlha di le PEDI fela. (4)
- 2.15 Oshupile le Matlhodi ba ne ba agile kwa kae? (1)
- 2.16 Lebaganya mafoko a a mo KHOLOMONG ya A le ditlhaloso tse di mo KHOLOMONG ya B.

KHOLOMO YA A		KHOLOMO YA B	
2.16.1	Ikomeng	A	Moeteledipele wa lekgotla la bobedi go ya go batla banna ba ba timetseng.
2.16.2	Serokolo	B	Mogatsa Tukisang
2.16.3	Moremi	C	Lephodisa la mo motseng.
		D	Modisa wa dikgomo tsa mmuso.

(3 x 1)

(3)  
[35]**KGOTSA****POTSO 3 (POTSO YA TLHAMO)****MORABARABA – SJ Lebethe**

Go itshupa fa Morwesi a ne a tsewa ke phefo fa go tla mo dikgannyeng tsa lorato. Netefatsa ntlha eno ka go kwala tlhamo e e ka nnang le mafoko a a kana ka 250–300 o bontshe ka moo magatwe le go nna matlhomantsi ga ga Morwesi di neng tsa mo tlhakatlhakanyetsa lorato ka teng.

[35]

**KGOTSA**

**POTSO 4 (DIPOTSO TSE DIKHUTSHWANE)****MORABARABA – SJ Lebetho**

Buisa nopollo e e latelang, mme morago o arabe dipotso.

Morwesi a boa kwa sekolong e le molwetsi yo mogolo. Fa a tsena mo gae a se ka a lobela mmaagwe sepe. Mosadimogolo a loga leano gore rraagwe a se ka a itse gore tota molato ke eng. Morago ga ditshipi di le tharo a boela sekolong. Bolwetse bo ne bo mo feditse, a sesafetse. O ne a momonegile gore a bo a ithomogepe pelo.

Pelo ya gagwe e ne e le botlhoko tota. A ikotlhaela go latlha Ntshimane yo o neng a na le maikaelelo, le go tsaya Mpute, le gona a mo tsaya mo tsaleng ya gagwe. Fela o ne a rata Mpute. A ithaya a re, nnyaya, ga se molato wa gagwe. Ke dumela gore e ne e le nako ya gore phoso e e ntseng jaana e diragale. E ka bo e ntse e diragetse le ka Ntshimane. O ne a rile pele a tloga kwa sekolong a kwalela mokapelo a mmolelela dilo tsothle. A mmolelela gore ga go ka o mongwe mokgwa, fela fa go tshwanetse ga fedisiwa. O tlogile kwa sekolong a ise a bone karabo.

Dikgwedi tse pedi tsa fela go sa diragale sepe. Ntshimane o ne a tsoga moso mongwe le mongwe a ya sekolong. O ne a feta moso mongwe le mongwe fa ga gaabo Bontle le fa ga gaabo Morwesi. Maitseboa mangwe le mangwe fa a boa kwa sekolong a feta fa ga gaabo Morwesi pele, mme a fete e kete ba ne ba dira lerata fela. E ne e le selomodiro.

Lebaka le la dira gore a iteye se fololetse mo dithutong tsa gagwe. Se e nnile semaka se segolo mo batsading. Ba lemoga gore morwaabona o tshwanetse a bo a rata go nna monna. Go ne go se ope yo o ka mo thusang; botshelo ke ba gagwe. Batsadi bona ba baya ditlhomoso fela. O ne a latlhegetswe ke tsholofelo gore o tshwana le basimane ba ba bangwe. Kwa sekolong go ne go se na sepe se se mo itumedisang ... Mmemme o ne a se gona. E rile a botsa gore o kae a utlwa gore o bonwe ke mosimane mongwe kwa Tshwane mme gompiano ke mosadi wa lelapa.

- 4.1 Ke bolwetse bofe bo bo neng bo tshwere Morwesi? (2)
- 4.2 Bolwetse ba ga Morwesi bo alafegile jang? (2)
- 4.3 Ka dintlha di le PEDI, tlhalosa gore Mpute ke motho yo o ntseng jang. (4)
- 4.4 Fa e ne e le wena o tshwerwe ke bolwetse jwa ga Morwesi o ne o tla dira eng? (2)
- 4.5 Naya ditlamorago di le PEDI tsa go tseela tsala lekau. (4)
- 4.6 Lerato la ga Mpute le Morwesi le feditswe ke eng? (2)
- 4.7 Ke dilo dife di le PEDI tse Mpute a makaditseng Morwesi ka tsona fa ba ne ba etetse kwa Ga-Rankuwa? (2)
- 4.8 Ke ka ntlha ya eng Ntshimane a ne a itaya se fololetse mo dithutong tsa gagwe? (2)

- 4.9 Leina la mosetsana yo Mpute a mo tsereng mo go Ntshimane fa a ne a etetse kwa Ntwane ke mang? (1)
- 4.10 Maitemogelo a gago ka lerato la ga Morwesi le Mpute ke afe? (2)
- 4.11 Ditiragalo tsa padi e, di senola motlha ofe? Tshegetsisa ka lebaka. (3)
- 4.12 Ke thuto efe e o e ithutileng go tswa mo pading e? (2)
- 4.13 Kgotlhang magareng ga Mpute le Ntshimane e tlhodilwe ke eng? (2)
- 4.14 Ke dilo dife tse PEDI tseo Mpute a neng a di newa kwa tirong fa a simolola go dira? (2)
- 4.15 Lebaganya mafoko a a mo KHOLOMONG ya A le ditlhaloso tse di mo KHOLOMONG ya B.

KHOLOMO YA A		KHOLOMO YA B	
4.15.1	Ga-Rankuwa	A	Kwa ga mmangwaneagwe Ntshimane.
4.15.2	Madibeng	B	Morwesi le Mpute ba ne ba etetse kwa teng.
4.15.3	Ntwane	C	Kwa gaabo Mmule.
		D	Rraagwe Mpute o ne a fudusediwa kwa teng.

(3 x 1)

(3)  
[35]**PALOGOTLHE YA KAROLO YA A: 35**



**KAROLO YA B: TERAMA****MOLATSWANA WA GAETSHO – DMG Sekeleko**

Araba potso e le NNGWE fela mo karolong e.

**POTSO 5 (POTSO YA TLHAMO)****'Moipolai yo o sa lelelweng' – EK Lebetho**

Seako ga a ka a nna legatlapa, o ne a lwela masimo a gagwe go fitlhela a fenyha Phika le Killer. Kwala tlhamo e e ka nnang le mafoko a a kana ka 250–300 e o tlhagisang ditiragalo tse di tshegetsang tlhagiso e.

**[35]****KGOTSA****POTSO 6 (DIPOTSO TSE DIKHUTSHWANE)****'Ba tla nkitse' – ES Lekalakala**

Buisa nopollo e e latelang, mme morago o arabe dipotso.

BOIPELO:	Moswinini, tshela setlabošane seo. Kana nna ke nyorilwe. <i>(Go utlwala jaaka a tshela)</i>
MOSWININI:	Ke tse ke di tshetse.
MORATWE:	Nna ke tla phoka kofi.
BOIPELO:	<i>(Ka lenyatso):</i> Wena Moratwe o itirile mmamorutinyana. Nna ke a inwela. Bojalwa bo lebatsa mathata a lefatshe, le gona bo a lapolosa.
MORATWE:	<i>(Ka mafega):</i> Nnyaya basadi, nna ga ke wa leloko leo.
BOIPELO:	<i>(Ka go nyatsa):</i> Owai! Moswinini tlogela Moratwe. Ka re boMoratwe ga ba itse sepe. Nna ke tile go lo bontsha metlholo. Bahumi ba Temba ba tla itse fa go na le motho a bidiwa Boipelo.
MOSWININI:	Dira moletlo wa diragadibonwe. O bitse ditaitai tsa motse ono. Ke raya gore ba tla go itse.
MORATWE:	<i>(Ka go tenega):</i> Ga se mokgwa wa nnete oo. Nna ga ke o bee sebetse. Wena Moswinini o wetsa Boipelo go dira ditiro tse di sa tleng. Motho yo ga se kgale a tlhokafaletswe. O sa ntse a le mo bontshong. A ga o elelelwe fa o dira boleo?
MOSWININI:	<i>(Ka go nyatsa):</i> Wena Moratwe o tshwenngwa ke dithuto tsa gago. Nna ga ke batle batho ba re ke fufegela dithuto tsa gago. O rutegile, o montle, mme ga o bue jaaka setlhalefi.

- 6.1 Tlhopha karabo e e maleba mo go POTSO 6.1.1–6.1.4.
- 6.1.1 Boipelo o atlholetswe dikgwedi di le ... kwa kgolegolong.
- A thataro
  - B lesome
  - C tharo
  - D tlhano
- (1)
- 6.1.2 Ramarumo o ne a ya kwa ... fa a tla bona kotsi ya sejanaga.
- A Temba
  - B Klipdrift
  - C Hammanskraal
  - D Tshwane
- (1)
- 6.1.3 Boipelo o tlaeilwe kwa maphodiseng ke ...
- A Moswinini.
  - B Moratwe.
  - C Mathule.
  - D Motswedi.
- (1)
- 6.1.4 Rraagwe Boipelo ke ...
- A Ranko.
  - B Motswedi.
  - C Mathule.
  - D Tau.
- (1)
- 6.2 Moswinini le Boipelo ba tsalana jang? (1)
- 6.3 Ke ka ntlha ya eng Moratwe a re Boipelo o sa ntse a le mo bontshong? (2)
- 6.4 Batsadi ba ga Boipelo ba ne ba utlwiwa ke eng bothoko morago ga loso lwa ga Ramarumo? (2)
- 6.5 Motho yo o thusitseng Boipelo gore gompiano a bo a le mo bontshong ke mang? (1)
- 6.6 Boipelo o ne a raya jang fa a re, 'ba tla nkitse'? (2)
- 6.7 Goreng go ne go le bothokwa mo go Boipelo gore Ramarumo a swe? Naya mabaka a le MABEDI. (4)
- 6.8 Tlhalosa ka boripana gore Ramarumo o sule jang. (2)
- 6.9 Ditiragalo tsa terama e, di diragalela kwa motseselegaeng kgotsa kwa motsesetoropong? Tshegetsa ka lebaka. (3)

- 6.10 A fa o lebile Moratwe ke tsala ya boammaruri? Tshegetsa ka lebaka. (2)
- 6.11 Moanelwamogolo ke mang mo terameng e? Tshegetsa ka lebaka. (3)
- 6.12 Ramarumo o ne a dirile eng se se dirileng gore Boipelo a palelwe ke go tshela botshelo jwa ditoro tsa gagwe? Naya dintlha di le PEDI. (4)
- 6.13 Go ya ka wena a go siame go bolaela motho dithoto tsa gagwe? Tshegetsa ka lebaka. (2)
- 6.14 Ke thuto efe e o ithutileng yona mo terameng e? (2)
- 6.15 Kotsi ya Ramarumo e diragaletse kwa lefelong lefe? (1)

**[35]****KGOTSA****POTSO 7 (POTSO YA TLHAMO)****'Mosese, Mosese, Mangole le Menwana' – SJ Shole**

Kwala tlhamo ya mafoko a a kana ka 250–300, ka tatelano ya ditiragalo (poloto) tsa teramakhutshwe e, go tloga kwa tshimologong go fitlha kwa bokhutlong.

**[35]****KGOTSA****POTSO 8 (DIPOTSO TSE DIKHUTSHWANE)****'Bo tla sa jang?' – C Modise**

Buisa nopolo e e latelang, mme morago o arabe dipotso.

KGOMOTSO: (*Ka kakanyo e e tebileng*): Hh ...!! Ke a bo ke ya go latsa kae tlhogo fa bosigo bo setse bo tsena jaana tota? Ke raya fa diphaposi tsotlhe di lotletswe jaana? Le tlala e nkabolotse. E kete go sejanaga se se emang fa ntle fa ... ka re ke tshaba le go okomela ruri, gongwe ke bone.

LEPHODISA: (*Go konyakonya motho mo lebating*): Koko ...!

KGOMOTSO: Tsena!  
(*Lebati le a bulega le be le tswalega*)

LEPHODISA: Dumela mma.

KGOMOTSO: Agee sajene.

LEPHODISA: A ke wena mogatsa Phofu mma?

KGOMOTSO: Ga ...ga ke itse gore a ke go ree ke re ee kana nnyaya jaaka Phofu a setse a bone mosadi yo mošwa sajene ... ke eng o botsa? Kana ...

LEPHODISA: Hm ...! Go thata.

KGOMOTSO: Go diragetse eng e kete o tla ntshosa jaana?

LEPHODISA: Pele re tla foo ... a o rata go nthaya o re lo kgaogane mma?

KGOMOTSO: Go kgaogana ga re ise re kgaogane saji; le gale ke bona re tloga re kgaogana. (*O rata go lela*) Ke bua jaana e le gore o sa le a lotlela ditswalo tsa diphaposi tsotlhe tsa ntlo a di naya kgarebe eo ya gagwe.

LEPHODISA: Ruri dilo di a diragala ... kgarebe eo ke mang? Le gone e nna kae?

KGOMOTSO: O bidiwa ... o nna mo ntlong ya bosupa mo go ona mmila o.

LEPHODISA: Tota ga ke itse gore o tsile go e tsaya jang kang e ...

8.1 Tlhopha karabo e e maleba mo go POTSO 8.1.1–8.1.4.

8.1.1 Setlhogo sa teramakhutshwe 'Bo tla sa jang' se kaya gore ...

- A bosigo bo tla sa jang.
- B bosigo bo sele.
- C se se tla tsogang se diragala ka moso kana mo nakong e e tlang, ga o se itse.
- D matsatsi a feta ka bonako. (1)

8.1.2 Kgomotso fa a goroga kwa ga gaabo o fitlhetse rraagwe a ile ...

- A tirong.
- B mabentleleng.
- C kerekeng.
- D masimong. (1)

8.1.3 Rraagwe Kgomotso ke motho yo o ...

- A pelotshetla.
- B tlhokang maikarabelo.
- C dumelang mo setsong.
- D pelotelele. (1)

8.1.4 Phofu o ne a solofeditse lekgarebe la gagwe ...

- A madi.
- B mpho ya mmotorokara.
- C mpho ya ntlo.
- D lenyalo. (1)

8.2 Kgomotso le Phofu ba amana jang? (2)

8.3 Ke eng se se bakileng kgotlhang mo magareng ga Phofu le Kgomotso? (2)

8.4 Naya leina la lekgarebe ya ga Phofu. (1)

8.5 Phofu o ne a naya Kgomotso molaetsa ofe ka go mo lotlelela kwa ntle? (2)

- 8.6 Phofu le lekgarebe la gagwe ba ne ba ya kwa kae fa ba lotlelela Kgomotso kwa ntle? (2)
- 8.7 Lephodisa le ne le tlile go dira eng kwa ntlong ya ga Kgomotso? (2)
- 8.8 Tiragalo e o e umakileng mo go 8.7 e tlhodilwe ke eng? (2)
- 8.9 A o bona go ne go siame gore Kgomotso a itshokele Phofu? Tshegetsa ka lebaka. (2)
- 8.10 Naya dikgato di le PEDI tse mokwadi a di tlhagisang go rarabolola bothata jwa ga Kgomotso le Phofu. (4)
- 8.11 Morero wa teramakhutshwe ke ofe? (2)
- 8.12 O ithutile eng ka modiragatsi yo o tshwanang le Phofu? (4)
- 8.13 Tlhalosa ka bokhutshwane gore teramakhutshwe e khutlile jang. (4)
- 8.14 Molwantshiwa mo teramakhutshweng e, ke mang? Tshegetsa ka lebaka. (2)

**[35]****PALOGOTLHE YA KAROLO YA B: 35**

**KAROLO YA C: DIKGANGKHUTSHWE****NGATANA YA LEHUMO – KM Mbonani le ba bangwe**

Araba potso e le NNGWE fela mo karolong e.

**POTSO 9 (POTSO YA TLHAMO)****'Ke tla thuswa ke mang?' – PJ Mathibe**

Phale o rakane le mathata a a mo fetang mo botshelong jwa gagwe. Kwala tlhamo ya mafoko a a ka nnang 250–300 ka ditiragalo tse di tshegetsang tlhagiso e.

**[35]****KGOTSA****POTSO 10 (DIPOTSO TSE DIKHUTSHWANE)****'Lenyalo ke kgetse ya lesogodi' – MI Siko**

Buisa nopollo e e latelang, mme morago o arabe dipotso.

'Bula ditsebe Mokgethi; maikaelelo a gago ke a bone a sa ntse a thuthuga. A o batla go nkhopetsa mowa ke le mmaago?'

Lekolwane la letsa molodi go emisa ditumuga gore le tle le utlwe se Dithole a se buang.

'Leeto le leleele se emise boraditsebe ba mosimane.'

Mosadimogolo a tiisa lefuto la tuku pele a ntsha se se mo mafatlheng.

'Mma kgotsa o ne o tletswe ke letsha ga o a ikutlwa fa o bua?'

Mokgethi a kgoberela metsi kwa pele ka potso ya gagwe.

'E bile o setse o ntshema mosadimogolo, ga ke lore ke a bua.'

'Maloba ke swabile nko go feta molomo mo thekising, basetsana bangwe ba ne ba bua ka wena le ngwana yole wa badidi. Ka leboga Modimo go menagane fa ke kgonne go utlwa dikgang pele kutu ya lerato e tia.' Mokgethi a tlhoma mmaagwe matlho jaaka ntsu; a ipotsa gore madi a mmutla a rothisitswe ke mang.

'Se rotole matlho, nkarabe, e seng jalo Mogasi o ya go itse fa re goroga kwa gae.'

Lekau la tshwara kwa le kwa, ditonki tsa ema fa thoko ga tsela jaaka e ka re di rata go utlwa se se buiwang. Ba tswa mo go tsona jaaka Pilato fa a ne a tswa mo tshekong ya ga Jesu.

'Ntekwane mma fa o ne o re ke go ise tleliniking kwa Kameelboom o ne o rata go mpotsa dilo tse, e ka re o tshwerwe ke setlhabi wa kgwa magala jaana? O tla mpotsa dipotso kwa gae e seng mo nageng.'

Mosadimogolo a mo tshosetsa ka gore o ya go phunya tlhagala fa pele ga rraagwe fa a sa mo arabe. Mokgethi a gopola bogale jwa ga Mogasi mme a ikobela mmaagwe. Lekau la leka go ritela mafoko ka thitelo ga se thuse sepe.

'Setlhabi se, se nkokonela ka ntlha ya gago ngwanaka, se lobe sepe.' 'Mma, a o rata go kgomarolola lenala mo kgononopeng?' Ya nna jaaka e ka re o badile mmaagwe. Dithole a tsholola tsa mathe, a ikana ka Bakgatla fa a ya go tlhalosa fa pele ga rraagwe.

'Ngwanaka ke go somaretse go tloga ka 1970 o sa ntse o bopega, o leitibolo la me e bile ke go rata go feta bomonnao. Se ntlisetse sego se se dutlang; le gona ke batla galase e seng dilo tsa kgale.'

Mokgethi a araba go emisa mmaagwe go bua mafoko a a bogale, a mo solofetsa fa a ka se tlhole a nnisana meriti le Lebogang. Mosadimogolo a mo atla go supa fa a itumetse. O ne a tla itheng ngwana wa batho gonne o opeletswe sebaka sa ura; bonolo jwa gagwe bo ne bo dira gore a se itseele ditshwetso.

- 10.1 Tlhopha karabo e e maleba mo go POTSO 10.1.1–10.1.4.
- 10.1.1 Setlhopha se se neng se opela pina ya mmamodikwadikwane ke ...
- A Manhattans.
  - B M.C.C.E.
  - C Sinaco.
  - D Sanco. (1)
- 10.1.2 ... o ne a ntshetsa Mokgethi sethunya kwa ntlong ya gagwe.
- A Mogasi
  - B Dithole
  - C Lebogang
  - D Terry (1)
- 10.1.3 Mokgethi o ne a isa mmaagwe kwa tleliniking ya kwa ...
- A Sun City.
  - B Kameelboom.
  - C Mankwe.
  - D Kameeldrift. (1)
- 10.1.4 Mokgethi le Morwesi ba ne ba simolola go ratana ka kgwedi ya ...
- A Seetebosigo.
  - B Phukwi.
  - C Ferikgong.
  - D Phatwe. (1)
- 10.2 Naya leina la mmaagwe Mokgethi. (1)
- 10.3 Rraagwe Mokgethi o ne a itsege ka eng? (2)
- 10.4 Goreng mmaagwe Mokgethi a ne a sa rate Lebogang? (2)
- 10.5 A o bona kgato e Dithole a e tsereng kgatlhanong le lorato lwa ga Mokgethi le Lebogang e ne e siame? Tshegetsa karabo ya gago. (3)
- 10.6 Ke thuto efe e o itseetseng yona mo khutshweng e? (2)
- 10.7 Naya lebaka le le dirileng gore Mokgethi a robale kwa bookelong. (2)
- 10.8 A o dumalana le ntlha ya gore maemo kgotsa thuto ga se motheo wa lenyalo? Tshegetsa ka lebaka o ikaegile ka khutshwe e. (3)

- 10.9 Ke eng se Mokgethi a letleletseng mmaagwe go se dira ka botshelo jwa gagwe? (2)
- 10.10 Mokgethi le Morwesi ba kopane lwa ntlha kwa kae? (2)
- 10.11 Ke eng se Mokgethi le Morwesi ba neng ba se dira mmogo go itumedisana? (2)
- 10.12 Anela ka bokhutshwane tiragalo e e neng ya dira gore Mokgethi a tswe a tshaba kwa ga gagwe. (2)
- 10.13 Ke pina efe e Lebogang le Mokgethi ba neng ba e utlweletse pele ba kgaogana? (2)
- 10.14 Neela dilo di le PEDI tse Mokgethi a neng a di fitlhela mo ntlong fa a ne a ile go tsaya dikwalo. (2)
- 10.15 Ka dintlha di le PEDI neela semelo sa ga Mokgethi. (4)

**[35]****PALOGOTLHE YA KAROLO YA C: 35**



**KAROLO YA D: POKO****MABOKO A SETSWANA – Morulaganyi MK Mothoagae**

Araba dipotso di le PEDI fela mo karolong e.

**POTSO 11 (DIPOTSO TSE DIKHUTSHWANE)**

Buisa nopolo e e latelang, mme morago o arabe dipotso.

**Bosiela – LD Raditladi**

- 1 Bosiela ga bo phimoge sekalobadi,
- 2 Ga bo na motho a bo tlhapa ka mosidi,
- 3 A bo phimola a bo tlhapela bodibeng,
- 4 Go tswa maswe, jone bo salele nameng.
- 5 Ke ledimo le jang batho le matlhape,
- 6 Moselesele o sadisang le makape,
- 7 Go sale bolota go sale botlhoko,
- 8 Go sale sebedu se tlhokang dipheko.
- 9 Bosiela ke pula ya kgogolamoko,
- 10 Ke mosetlho o sa rwalelwang le ditlhako;
- 11 Bo go kolobetsa bo sa go rapele,
- 12 Bo go tlhabe dinao, ditlhako o di rwele.
- 13 Bosiela ruri ke leselamotlhaka
- 14 Le utswang dikoko, masogo le dikgaka;
- 15 Bo tseno fela le fa ntlo e ageletswe,
- 16 Bo bo bo senya lokgapho lwa ntlo e feetswe.

- 11.1 Ke ponagalo efe ya poko e e tlhagelelang mo meleng ya 7 le 8? (2)
  - 11.2 Ke sekapuo sefe se se tlhagelelang mo moleng wa 12? (2)
  - 11.3 Ke ka ntlha ya eng mmoki a tshwantsha bosielala le ledimo? (2)
  - 11.4 Tlhalosa gore mmoki o kaya eng mo moleng wa 16. (2)
  - 11.5 Ke eng se se tsholang bosielala? (2)
  - 11.6 Nopola sekapuo sa tshwantshiso mo temaneng ya 4. (2)
  - 11.7 Fa o lebile goreng bosielala bo sa phimoge? (2)
  - 11.8 Maikutlo a mmoki ke afe mo lebokong le? Tshegetsala ka lebaka. (2)
  - 11.9 Ke molaetsa ofe o mmoki a re nayang ona? (1½)
- [17½]**

**KGOTSA**

**POTSO 12 (DIPOTSO TSE DIKHUTSHWANE)**

Buisa nopolo e e latelang, mme morago o arabe dipotso.

**Mahuma-pelo a ga Phokojwe – MS Kitchen**

- 1 Ruri legodimo le ka be le na le mogala
- 2 Nkabo ke lotlegela Mmopi, ke re a utlwe,
- 3 A thuse, a kgalemele motho re a nyelela,
- 4 Re nyelediwa ke motho le ntšwa ya gagwe.
  
- 5 Ga ke bewe sebetse, Mongwe wa diphologolo!
- 6 Le fa go dutsweng gone go dutswwe fela ka nna-
- 7 Monkgwe wa dibatana! Ke ntshitswe loso-logolo
- 8 Ga twe le ke le bathong mokgwa ke gana ka one
  
- 9 Jalo bana ba batho ba mekgwa mme e ngokologilwe,
- 10 Wa me one fa o gopotswe ke tlhola-e-eme;
- 11 Ga e ke e re go umakwa o didimalelwe,
- 12 Ba re sa me ga se bolotsana ke ntlo-lo-bone.
  
- 13 Ga nke ke tswa ke sela-sela tsatsi le tlhabile,
- 14 Ke itala go lala ke kaila go sa robetswe,
- 15 Ke apere lefifi maeba a sa sedile,
- 16 Ke sikologa badipa – motho le ntšwa ya gagwe.

- 12.1 Mmoki o utlwisitswe botlhoko ke eng? (2)
  - 12.2 Mmoki o kopa gore Mmopi a dire eng? (2)
  - 12.3 Ke dilo dife tse PEDI tse di dirang gore phokojwe a nyelele? (2)
  - 12.4 Nopola mola o o tlhalosang gore maitsholo a ga phokojwe ke a a feteletseng. (2)
  - 12.5 Goreng Phokojwe a selasela go robetswe? (2)
  - 12.6 Leboko le, ke la mofuta ofe? Tshegetsisa ka lebaka. (1½)
  - 12.7 Ke ponagalo efe ya poko e e tlhagelelang mo meleng ya 14 le 15? (2)
  - 12.8 Fa o lebile mmoki o eletsisa gore go diragale eng? (2)
  - 12.9 Molaetsa wa leboko le ke ofe? (2)
- [17½]**

**KGOTSA**

**POTSO 13 (DIPOTSO TSE DIKHUTSHWANE)**

Buisa nopollo e e latelang, mme morago o arabe dipotso.

**Botlhanka – SF Motlhake**

- 1 Ke go boleletse gangwe le gape,  
2 Go lemala ga namane ke go lala le mmaayo;  
3 Motlhanka o simolotse go botologa  
4 Ke tlile go tswa natso go tlhabilwe mankokwane.
- 5 Ke go boleletse gangwe le gape,  
6 Motlhanka ga a ntshetswe meno,  
7 Wa leka, o a itebala;  
8 A tloge a thube kobo segole.
- 9 Ke go boleletse gangwe le gape,  
10 Motlhanka ga nnele molelo le batho;  
11 Motho o a tle a intshe maise,  
12 Go tlogwe go sekwe mafoko a se na mmui.
- 13 Ke go boleletse gangwe le gape,  
14 Batho ga re lekane re se meno.  
15 Ntšwa di gana go robala ntle,  
16 Re tlile go solwa lesolo se se mankopa.
- 17 Ke go boleletse gangwe le gape,  
18 Motlhanka motho, ga a kgwelwe mathe;  
19 Wa leka, o itshenyetsa didiba;  
20 E tla re madiba a tšhwa, wa ngoalala.

- 13.1 Tlhalosa gore mmoki o kaya eng ka mola wa 18. (2)
- 13.2 Naya leina la ponagalo ya poko e e tlhagelelang mo meleng ya 10 le 11. (2)
- 13.3 O tlhaloganya eng ka lefoko 'Motlhanka'? (2)
- 13.4 Tlhalosa bokao jwa temana ya 2. (2)
- 13.5 Mmoki o kaya eng fa a re 'Ke tlile go tswa natso go tlhabilwe mankokwane'? (2)
- 13.6 Maikutlo a mmoki ke afe, go ya ka temana ya 1? Tshegetska ka lebaka. (2)
- 13.7 Go ya ka wena, motlhanka o tshwanetse go tsholwa jang? Tshegetska ka lebaka. (2)
- 13.8 Leboko le ke la mofuta ofe? Tshegetska ka lebaka. (1½)
- 13.9 Goreng mmoki a boeletsa mola o 'Ke go boleletse gangwe le gape' mo temaneng nngwe le nngwe? (2)

**[17½]****KGOTSA**

**POTSO 14 (DIPOTSO TSE DIKHUTSHWANE)**

Buisa nopolo e e latelang, mme morago o arabe dipotso.

**Bojaki – SF Motlhake**

- 1 Re teye maina, re gakanenge;
- 2 Leo le bonoga leina la ga Noge.
- 3 Leina lebe, borara, tlhe seromo;
- 4 Re tise leina le ya boreelelo.
  
- 5 Koo-koo, bagaetsho dumelang, Bakwena.
- 6 'Kwena, mme ntlha lo beile mopakwana?
- 7 Ya baagi yotlhe mefiko e tswetse,
- 8 Ka phaladi e ba phatlaladitse.
  
- 9 Semethemetheng mojaki a iphua,
- 10 Le ketekete tsa batho a di rua.
- 11 Batho ba mmona, o ka re ke bana;
- 12 Ba mo farafara e se mmaabona.
  
- 13 La latsa ditlhokwa fatshe lefatshe,
- 14 Le mojaki a bona a falotse;
- 15 Lejwe a le konopetse morago;
- 16 Kwa ga mothakga go ntswe ka marago.

- 14.1 Mmoki o ikopela eng mo temeng ya 1? (2)
- 14.2 Maikutlo a mmoki ke afe? Tshegetsa ka lebaka. (2)
- 14.3 Nopola mela e MEBEDI go tswa mo temaneng ya 3 e e kayang gore mmoki o ne a iketlile le batho ba le bantsi kwa a neng a le teng. (2)
- 14.4 Ke ponagalo efe ya poko e e tlhagelelang mo moleng wa 6? (2)
- 14.5 Leboko le, ke la segompieno. Naya dintlha di le PEDI go tshegetsa ntlha e. (2)
- 14.6 Fa o lebile goreng mmoki a ne a makadiwa ke go bona mopakwana fa mojako? (2)
- 14.7 Naya leina la sekapuo se se dirisitsweng mo moleng wa 13. (2)
- 14.8 Goreng mojaki a ne a ipona a falotse? (2)
- 14.9 Mmoki o kaya eng ka mola wa 15? (1½)

**[17½]**

**PALOGOTLHE YA KAROLO YA D: 35**  
**PALOGOTLHE: 70**